

Nyaenma Baen Makcoengz

狐狸分松果

Ndaw ndoengfaex miz 40 duz noucoengz, gyoengqde doxgyaex dox-huz youq ndaw ndoengfaex gvaq saedceij, miz gijmaz ndei gwn cungj dwg daihgya bingzfaen, soqlai mbouj vi duz lawz.

Miz baez ndeu, 40 duz noucoengz itgungh ra ndaej 260 aen makcoengz, hoeng cungj dwg suenq mbouj ok moix duz noucoengz wnggai baen ndaej geijlai aen makcoengz. Gyoengq noucoengz nyaengq baenz buenq-ngoengz, dungx cungj iek ndaej heuhgugu lo, lij caengz suenq ndaej ok.

Cungj cingzgvang noucoengz


baen makcoengz neix, caeux couh deng duz nyaenma ndoj youq baihrog haenx yawj ndaej cingcing cujuj. Nyaenma byaijngabngab daengz baihnaj gyoengq noucoengz naeuz: “Gijmaz saeh sawj sou baenzneix simgaenj ha?” Caengz caj gyoengq noucoengz han, nyaenma ciepdwk naeuz: “Dwg baen makcoengz mbouj yinz ba. Gij saeh neix ndei banh hane, gou daeuj bangbang sou, mboujgvaq gij lingzdaeuz baen lw haenx gvi gou, baenzlawz yiengh?”

Gyoengq noucoengz siengj, gawqyienz dwg lingzdaeuz lw roengz haenx, haengjdingh haemq noix, couh

dapwngq lo.

Nyaenma cang yiengh youh geq makcoengz youh geq noucoengz. “260 aen makcoengz, baen hawj 40 duz noucoengz, $260 \div 40$, moix duz noucoengz wnggai ndaej……” Nyaenma gangj dwk youq gwnz dieg sij ok gij cigsik cawzfap daeuj.

Gyoengq noucoengz yawj aen suenqsik, cungj ngaekngaek gyauej. Duz noucoengz he ciengj dwk naeuz: “Raeuz gak boux ndaej 6 aen makcoengz, lij lw 2 aen makcoengz.” Nyaenma bek aenmbaq duz noucoengz haenx naeuz: “Mwngz caen coengmingz ha! Seizneix sou moix duz



noucoengz aeu bae 6 aen makcoengz, doeklaeng lw roengzdaeuj haenx couh hawj gou cimzcimz ba.”

“Gaej gaenj!” Duz noucoengz he diuq daengz baihnaj nyaenma, “cawzsoq, dengcawzsoq ndaw cigsik cungj veh bae aen 0 he, biuji gyoengqde doengzseiz cawzbae 10. Gaengawq singqcaet cawzfap, sangh (ndaej soq) dwg mbouj bienq, hoeng soq lw roengzdaeuj haenx hix deng cawzbae 10 lo. Lingzdaeuz mwngz aeu haenx mbouj dwg 2 aen, dwg 20 aen, beij moix duz noucoengz baen ndaej haenx lai lai lo.”

“Laxlawz nyaenma dwg daeng-suenq loek yaeuh raeuz! Nyaenma mbouj lauxsaed mbouj soujsaenq, raeuz mbouj baen makcoengz hawj de!” Gyoengq noucoengz hozndat dangqmaz, aen makcoengz he cungj mbouj hawj nyaenma.

(haj nienzgaep Vangz Ginhsui)



Gij Wngqcingz Gou Caeuq Daxboh

我和爸爸的承诺

Gaxgonq daxboh yinx citien, gou yinx hwnjmuengx. Daxboh aenvih youq gwnz mbonq citien, ceng di deng feizcoemh; gou aenvih ciengz hwnjmuengx guhcaemz dwk youzhi, hagsib cingzcik gig vaiq doek roengzdaeuj. Vihneix daxmeh “gyauyuz” gou caeuq daxboh haujlai baez lo, dou hix roxnynih swheij guh mbouj deng. Yienghneix gou caeuq daxboh wngqcingz: Gaiq gij sibgvenq mbouj ndei bae.

Gvaqlaeng, gou gamduk daxboh, daxboh daezsingj gou, daxmeh dang caizbuenq. Mwh daxboh ienyinx daeuj lo, gou couh heuh de daeuj fujdauj gunghgo gou, gou ne, baez sij sat cozyez, couh siengj hwnjmuengx guhcaemz, mwhde daxboh couh ra geij bonj saw daeuj, caeuq gou doxcaez yawj saw. Miz seiz daxmeh raen dou miz hoengq le, couh heuh dou guh di hongranz, cingjleix suenbyaek, rwd raemx hawj gova, roxnaeuz guh yindung daengj.

Gig vaiq gou caeuq daxboh gaiq ndaej yinx hwnjmuengx caeuq citien bae lo. Gij wngqcingz gou caeuq daxboh dou guh ndaej daengz lo.

(sam nienzgaep Yez Cungh-cwngz)

Yawjbyoengq Aenhongx

巧识骗局

Ndaw sujgyaj, Siujhuj caeuq dahcej caez ma ranzmbanj yawj daxgoeng daxbuz.

Gyoengqde daengz ndaw cin roengz ci le, Siujhuj raen henz loh miz gyoengq vunz he humx youq giz ndeu. De caenx haeuj ndaw geh vunz bae, yawjraen boux cawjdan he gaemdawz aen daeh he hemq: “Hoemq da mo giuz, mo baez ndeu 2 maenz. Ndaw daeh miz giuznding, giuzlamz gungh 20 aen, mo ok 10 aen giuz, danghnaeuz giuzlamz caeuq giuznding gak 5 aen, ndaej ciengj 200 maenz.”

Siujhuj yawjraen haujlai vunz bae mo, hoeng mbouj miz saek boux mo ndaej ciengj. De sikhaek siengj daengz gij cihsiz “goj-

nwngzsing” hag gvaq haenx, couh dawz 2 maenz ngaenz okdaeuj, doiq cawjdan naeuz: “Boh’ au, gou siengj mo baez ndeu.” Cawjdan sou cienz Siujhuj le, ndenq aendaeh hawj Siujhuj. Siujhuj mbouj cigciep mo giuz, dauq dwg aeu gij giuz cienzbouh raix okdaeuj: “Daihgya vaiq di daeuj yawjyawj baihindaw miz gijmaz!” Cawjdan siengj lanz Siujhuj, hoeng gaengq ceiz lo. Gyoengqvunz seizneix cij fatyienh, giuzlamz ndaw daeh cij miz 4 aen, gizyawz cungj dwg giuznding.

Siujhuj naeuz: “Daihgya yawj, gijneix couhdwg gij yienzaen sou vihmaz mo le geijcib baez, cungj mbouj mo ndaej deng saek baez lo, baihindaw cij miz 4 aen giuzlamz,



baenzlawz mo ndaej ok 5 aen giuzlamz daeuj ne?”

Gyoengqvunz bouxboux cungj naeuz cawjdan, cawjdan najmong raixcaix. De dawz gij cienz sou ndaej haenx cungj doiq hawj daihgya, gouz daihgya yienzliengh de, lij baujcingq baezlaeng mbouj caiq guh gij saeh yaeuh vunz neix.

(sam nienzgaep Goh Yinyen)



Cuengqgyaj le, miz ngoenz ndeu, gou bae aen bouq ranz gou hai haenx bang daxmeh gai huq.

Dou ngamq hai dou, couh miz boux boh’ au he daeuj cawx doxgaiq. De cam: “Sou gizneix miz mbouj miz fwngzdienhcuengq, loz-swhdauh caeuq hongdawz cujhab?”

“Miz ha, geij yiengh neix mwngz cungj cawx lwi?” Gou yiedcingz dwk cam.

“W, cungj cawx! Fag lozswhdauh he, aen fwngzdienhcuengq he, dauq hongdawz cujhab he, itgungh geijlai cienz?” Boh’ au cam.

Gou Dang Bouxgaihuq

我当营业员

“Lojshwdauh 5 maenz, fwngz-dienhcuengq 250 maenz, hongdawz cujhab 130 maenz, itgungh 385 maenz.”

“Siujbaengzyoux, gou cawx baenzlai doxgaiq, ndaej mbouj ndaej noix di cienz ha?”

“Ndei ba, dou ngamq haidou, couh noix di cienz hawj mwngz ba.” Gou riu dwk naeuz.

Gou cam daxmeh le, doiq boh’ au naeuz: “Fwngzdienhcuengq noix 20 maenz, hongdawz cujhab noix 10 maenz, itgungh noix sou mwngz $20+10=30$ (maenz).”

“Ndei ba, bang gou cang doxgaiq hwnjdaeuj ba!” Boh’ au mbon cienz okdaeuj seiz, soujgih de yiengj lo, de dawz 400 maenz okdaeuj ndenq hawj gou, riujdawz doxgaiq couh ok bakdou bae ciepdienhvah lo.

Sam cungj doxgaiq yenzgyaq

dwg 385 maenz, vanzgyaq le dwg $385-30=355$ (maenz), wnggai cau cienz hawj boh’ au dwg $400-355=45$ (maenz). Gou suenq okdaeuj le, yaek cau cienz hawj boh’ au seiz, boh’ au mbouj raen lo. Gou ganj-vaiq gyaep okbae, buet geijcib mij le cij gyaep hwnj boh’ au: “Boh-au, neix dwg gij cienz cau hawj mwngz, mwngz gaem ndei nw.”

“Gou cij goq ciepdienhvah, cungj lumz gienh saeh neix lo!” Boh’ au gig docih dwk naeuz, “Docih mwngz, siujbaengzyoux! Sou baenzneix lauxsaed soujsaenq, baezlaeng gou yaek cawx gijmaz couh daeuj aenbouq mwngz cawx, gou vanzlij gaisau bouxwnq daeuj cawx dem.”

Doenggvaq gienh saeh neix, gou roxdaengz le lauxsaed soujsaenq dwg gig youqgaenj.

(seiq nienzgaep Lij Hausiengz)